

王
船
山
遗
书

王

船

山

遺

書

禮記章句卷二十

船山遺書十三

衡陽王夫之譔

雜記上

記喪禮之變者及其小節以篇策繁多分爲上下篇謂之雜者記輯舊文略無次序又兼君大夫士而錯紀之也凡四十四章

諸侯行而死於館則其復如於其國如於道則升其乘車之左轂以其綏復

復芳服反乘食證反綏與綏通儒誰反下並同

行謂朝會在外館主國所授舍也生其館則死卽其寢得專有之不避主人矣乘車別於兵車之名左轂象屋

東榮不於廬邸者非其所久安也綏旌旂之旄也去其
旂者異於生也旌旂者所以爲章識故神依之也復之
人數如其命貳車皆君之駕每車一人各持其綏

其輶有祲緇布裳帷素錦以爲屋而行

輶倉佃反
祲蚩占反

輶載柩之車飾也若未大斂載尸亦然用赤色帛爲覆
張之車上祲四旁垂下如簷也裳帷附柩之帷下垂如
裳屋綴裳帷上附棺而覆之其制內施屋帷外加輶祲
祲露帷之半素錦白縛也行歸返國也必盡飾忌人之
惡見之也諸侯尊尤加華美

至於廟門不毀牆遂入適所殯唯輶爲說於廟門外

說他
活反

同下

廟殯宮蓋卽正寢而稱廟者從乎死者之辭也毀徹也
牆裳帷也裳帷不徹錦屋亦不徹矣所以然者以殯必
有帷有荒因仍之不重設也所殯兩楹之間不於西階
者以自外來不忍賓之故用殷禮也說輅者輅以象宮
室在宮則可說且不可施之殯也

大夫士死於道則升其乘車之左轂以其綏復如於館死
則其復如於家大夫以布爲輅而行至於家而說輅載以
輅車入自門至於阼階下而說車舉自阼階升適所殯
布白布輅車無輻合大木爲輪崇減乘車之半卑而安

也大夫裳帷用布屋亦用錦與諸侯同諸侯之載亦用
輜車至於阼階下而說車舉自阼階皆與大夫同錯互
見之

士輅

句

葦席以爲屋蒲席以爲裳帷

輅亦用白布與大夫同內飾異耳葦荻之大者載以輶
軸不言者文略

右第一章

凡訃於其君曰君之臣某死

方仕而卒其家命訃之辭也

父母妻長子曰君之臣某之某死

長丁
丈反

喪主爲大夫士者也庶子不訃若仕則自以其名訃不繫於父不言敢告執事者君臣恩義相屬其辭質

君訃於他國之君曰寡君不祿敢告於執事

不祿謂不終其祿也尊之故不斥言死告於執事者尊鄰君也按周之初制諸侯訃皆以名惟天子不名但稱寡君者周末之僭辭故春秋書宿男卒而胡氏以爲譏是也

夫人曰寡小君不祿大子之喪曰寡君之適子某死

大他蓋反

適都歷反下同

夫人與君敵體世子父在斯爲子其禮降矣云敢告於

執事蓋與君同

大夫訃於同國適者曰某不祿訃於士亦曰某不祿訃於他國之君曰君之外臣寡大夫某死訃於適者曰吾子之外私寡大夫某不祿使某實

實蓋至字之誤脂利反

適者爵齒均也不言告執事者以言執事則必有弔賻之儀當勤執事大夫不敢微也訃於適者鄰大夫也士鄰士也私交好之稱實謂專來告也按人臣無境外之交大夫而訃於鄰國又僭稱寡大夫皆周末之僭禮爾

士訃於同國大夫曰某死訃於士亦曰某死訃於他國之君曰君之外臣某死訃於大夫曰吾子之外私某死訃於士亦曰吾子之外私某死

士賤其辭略

右第二章

大夫次於公館以終喪士練而歸士次於公館大夫居廬

士居堊室

士次士字衍文次於公館當在練而歸之上蓋錯誤

謂居君之喪也大夫於既殯之後居倚廬既葬居堊室練而次於公館終喪而歸士既殯而居堊室葬而次於公館練而歸倚廬在門內倚垣結草覆地而不塗堊室

禮記章句卷二十二
四
在門外有簷宇塗以堊土均爲三年之喪而大夫之居降於嗣君士降於大夫君臣之義以尊卑爲輕重也

右第三章

大夫爲其父母兄弟之未爲大夫者之喪服如士服士爲

其父母兄弟之爲大夫者之喪服如士服

爲其之爲于僞反

士之喪服自齊衰以上與大夫異大功以下乃同其制不可悉考見於儀禮者則三升者大夫之斬衰也縷如三升半而成布三升者士之斬衰也齊衰則大夫以上四升士縷如五升而成布四升大要位尊者備服備服者服亦麤惡士無三升之斬四升之齊不備服也故晏

子服麤衰三升半而其老以爲非大夫之禮是已於母
言爲大夫者妻從夫爵也不敢以己之尊加於父母兄
弟亦不敢冒父母兄弟之尊而自尊故皆服士服

大夫之適子服大夫之服

適都
歷反

此周末世官相承之僭

大夫之庶子爲大夫則爲其父母服大夫服其位與未爲

大夫者齒

爲其之爲
于僞反

爵同則服無嫌矣雖適長士服已無所抑位則自以嫡
庶長幼序不可踰也

士之子爲大夫則父母弗能主也使其子主之無子則爲

之置後

爲之爲
于僞反

主主其喪也大夫之喪禮隆君子不以子之爵自貴也

右第四章

大夫卜宅與葬曰有司麻衣布衰布帶因喪屨緇布冠不

黹占者皮弁

衰倉同反黹與
綏同儒誰反

宅墓地有司謂相及命龜作龜者麻衣白布深衣布衰
以三升半布爲衰及負版加於深衣胸頃閒布帶齊衰
之帶因仍也喪屨蓋疏屨卜以接神故其衣冠用吉而
大夫之有司取具於家臣固有齊衰之服則加衰而帶
屨不改冠不綏以不奪其凶若占者則大夫家不藏龜

用公家之占人純以吉禮接神矣

如筮則史練冠長衣以筮占者朝服

朝直遙反

史筮人練冠縞冠長衣深衣之純以素者筮下於卜故純凶然筮宅在三月以內而服練冠則亦變其本服矣朝服元端服不皮弁服者亦以筮輕也

大夫之喪既薦馬薦馬者哭踊出乃包奠而讀書

薦進也柩自廟將行就道而進馬駕其乘車也薦馬者謂當薦馬時也哭踊馬駕將行而主人哭踊也出柩自廟出也包奠包所奠之牲體置遣車以行也讀書讀贈也士喪禮包奠置遣車公史讀書已乃出大夫則柩已

出而後包奠追及讀賵於門外禮彌文也

大夫之喪大宗人相小宗人命龜卜人作龜

相息亮反

宗人家宗人也周禮家宗人上士二人中士四人上士
大宗人中士小宗人也士之宗人無大小故儀禮但言
宗人命龜大夫備官故大宗人相而小宗人命龜相相
主人泣卜命龜告所問事作灼之也

右第五章

復諸侯以褒衣冕服爵弁服夫人稅衣揄狄稅素沙

復芳

服反稅與祿同吐玩反揄余招反此節舊
在其餘如士之下今從陳氏本定序於此

褒衣受命始賜之冕服冕服其餘冕也公自衮冕以下

侯伯鷩冕以下子男毳冕以下爵弁服纁裳純衣黼黻
人君之祭服也言冕弁者服從其冠實不用冠也稅衣
黑色夫人御於君之服揄狄通作鵠翟刻繒爲雉青質
五色備綴於衣上侯伯夫人之上服也喪大記言夫人
以屈狄則子男夫人之上服互記之耳言稅衣揄狄者
自稅衣而上至揄狄有闕狄鞠衣展衣其服五也素沙
者白紡紬以爲揄狄以下之裏婦人之服必複也凡復
之人數如其命人持一衣故衣皆備焉

內子以鞠衣褻衣素沙下大夫以褫衣其餘如士

禮時
戰反

內子謂世婦以下內命婦及卿之適妻鞠衣色如鞠塵

黃綠之間以其受命乃得服之故又云褒衣素沙亦謂其裏也下大夫亦謂其妻也襢衣周禮作展衣其色白士妻之服祿衣而已餘如士者內子及下大夫之妻下統祿衣也按此章夫人稅衣之上宜有卿元冕下大夫爵弁其餘如士之文舊本脫爾

復西上

人多者橫陳屋脊間持褒衣者最西以次而東士一人復在中屋

右第六章

大夫不揄絞屬於池下

揄余招反絞何交反屬之欲反

謂喪車之飾也揄畫繒爲雉青黃之間曰絞池以竹爲之垂荒下象宮室之承霤人君以絞繒幕池而垂於池下爲振容大夫幕池而已不下垂也按此章當備記上下喪車之飾餘皆殘脫僅存此條其詳則見喪大記

右第七章

大夫附於士士不附於大夫附於大夫之昆弟無昆弟則從其昭穆雖王父母在亦然

附與祔通卒哭廟未遷主無所入乃祭死者之祖附其主以從食祭已復於寢祥而後遷廟新主乃入廟焉附必用其所得之牲禮孫可降以從祖祖不可降從孫不